



Iruñeko Udalaren 2015eko Memoria

Eremu publikoaren kudeaketa

Jarduerak eremu publikoan

2015ean, 907 jarduera baimendu ziren eremu publikoan, 2014an baino gehiago (831), Iruñeko karriketan egiten den jardueraren erakusgarri. Baimena eman aurretik, auzokideei erasaten ez dietela baieztatzen da, edo, bestela, erasanak ahalik eta txikienak izan daitezen behar diren neurriak exijitzen dira. Eremu publikoan jarduerak egin dituzten entitateek, pertsonak eta elkarteek oro legearen arabera eratuak egon behar dute, eta izena emanik egon Herritarren Segurtasuneko Alorreko Ikuskizun eta Josteta Jardueretarako Enpresen Erregistroan.

Udalak eremu publikoan antolatzen dituen jardueren adibide bat San Blas eguna da, egun horretan 21 postu jartzen baitira San Nikolas plazan eta San Migel kalean, Sarasate pasealekuaren eta San Nikolas plazaren artean, opilak eta gozoak saltzeko, goizeko 09:00etatik gaueko 09:00etara. Beste adibide tradizional bat gaztainen salmenta da. Udalak, izan ere, 12 kokaleku eskaintzen ditu; gehienak, Alde Zaharrean daude.

Halaber, Udalak urtero baimenak ematen ditu produktuak postu finkoetan eta salmenta ibiltarian saltzeko sanferminetan, hiriko auzoetako jaiak ospatzeko, inauteriak ospatzeko, eta Landabengo azokan, etab.etan saltzeko.

Baimendutako jarduerak	2011	2012	2013	2014	2015
Kirol-jarduerak	52	38	64	52	61
Eskeko mahaiak eta mahai informatiboak	30	44	51	54	67
Kultur jarduerak	3	26	12	5	15
Erakusketak eta publizitate-kanpainak	14	15	40	33	43
Informazio- eta publizitate-autobusak	29	31	27	48	33
Merkataritza-jarduerak	25	36	20	33	38

Festa-ekitaldiak	200	208	235	274	254
Desfileak	66	55	50	59	90
Filmaketak	6	13	15	17	19
Auzoetako festak	10	12	11	11	12
Askotariko baimenak	32	72	9	54	30
Terrazak	177	73	117	147	174
Jarduerak sanferminetan	83	91	91	44	48
GUZTIRA	727	714	742	831	907

Terrazak eta elementuak eremu publikoan

2015eko bukaeran, 656 lizentzia emanik zeuden eremu publikoa terrazen bidez hartzeko, eta 75 lizentzia, bestelako okupazioetarako (loreontzi-euskarriak, erakustokiak, etab.), Eremu publikoan terrazak eta ostalaritzari nahiz dendei lotutako beste elementu batzuk jartzea arautzen duen ordenantza 2013ko urtarrilean indarrean sartu zenetik, data hori baino lehenagoko lizentziak berrikusten ari dira, ordenantzarekin bat datozen ikusteko.

Manifestazioak eta elkarretaratzeak

Bilera Eskubidea arautzen duen eta apirilaren 21eko 9/1999 Lege Organikoak aldatu zuen uztailaren 15eko 9/1983 Lege Organikoa betez, Herritarren Segurtasuneko Alorrak txostena ematen du Gobernu Ordezkaritzak Iruñean baimendutako elkarretaratze eta manifestazio guztiei buruz, eta, zirkulazioa kontrolatzen du haietan, normaltasunez egin ahal izateko. Guztira 984 ekitaldi egin ziren: 854 elkarretaratze eta 130 manifestazio.

Sanferminetan

Sanferminetarako plan orokorrak babes zibilaren ekintza nagusiak zehaztu ditu; hots, egitarauan ageri diren ekitaldiak eta jaietako eguneroko bizitza babestu eta zaintzea, bai eta ekintza zehatzagoak ere, hala nola bide-zirkulazioa berregituratzea. **Babes zibileko 101 laguntzaile** kontratatu ziren jaietarako (*naranjito* deritze), sarbideak kontrolatzeko lanetan, zaintzan, hainbat ekitaldiren laguntzan eta objektu galduen bulegoan aritzeko. Halaber, berezko bi kontratu egin ziren, obra-hesien eta osagarrien inguruan, hainbat eremu babesteko, hala nola harresiak, su artifizialak, ganadu-feria, Gaseko eskortak, hiribus-geltokiak eta lorategiak; kontratu bata hornikuntza eta garraiorako da; eta bestea, berriz, hesiak nahiz

osagarriak jarri, mantendu eta kentzeko.

Feria-lekua, seigarren urtez jarraian, Runa parkean ezarri zen, 30.000 metro koadrotik gorako azalera batean, Arrotxapeko eta El Vergel zubien artean, hitzarmen bidez Erruki Etxeari lagata. 76 atrakzio ezarri ziren. Aurreko urteetan bezala, salmentarako **postu finkoak** ere baimendu ziren kalean. Zehazki, 160 postu Taconeran jarri ziren; 7, II. Zabalguneko hainbat tokitan; eta 5, San Nikolas plazan.

Gainera, 4.200 m²-tan baino gehiagoan handitu zen eremu publikoan **festari eskainitako aldea**, betiere kontuan hartu gabe Antoniuttiko ostalaritza-instalazioak eta eskualde-etxeenak, horiek ere baimendu baitziren. Zehazki, 10 terraza handitze, 3 karpa barradun eta 2 mahaitxo-karpa barradun, Erriberri kalean; 5 karpa, Joan Labritekoaren kalean; Ikastolen Elkartek Taconeran jarritako instalazioak; Foruen plazan ezarritako ostalaritza-gunea; etab.

Eraso sexistarik gabeko jaien alde kanpainaren baitan, parte-hartzaile guztiei gogoratu zitzaien Udalak konpromisoa daukala ez onartzeko, eta irmotasun handiz jazartzeko, festak gozatzean emakumeen askatasuna, segurtasuna eta berdintasuna kaltetzen ahal dituzten portaerak oro.

Ganadu-feriak

Sanferminetako ganadu-feria tradizionala uztailaren 7an egiten da, **San Fermin egunean**, Iruñeko Agustindarren industrialdeko 14.300 m²-ko lursail batean; Espainiako iparraldeko garrantzitsuenetako bat da. Zaldi-aziendari soilik dago eskainia; hau da, zaldiak, behorrak, zaldikoak, behokak, astoak eta mandoak biltzen dira. Hainbat autonomia-erkidegotako abeltzain, tratulari eta zaldi aleak bertaraten dira.

Urteko bigarren ganadu-feria **sanmigeletakoa** da, irailaren 29an egiten dena, hori ere Iruñeko Agustindarren industrialdean. Feria horretarako, Udalak 106 ukuilu soil eta 12 bikoitz prestatu zituen animaliak hartzeko, baita hipodromo bat erakustaldia egiteko. Abeltzainek 3 eta 8 euro arteko tasak ordainduta erabiltzen ahal dituzte ukuilu horiek. 2015ean, 260 abelburu erregistratu ziren, eta 207 salmenta izan ziren.

Erregeen Kabalkada

Segurtasun-neurriak hartzen dira, kabalkadak egiten duen ibilbidean istripurik ez izateko. Ibilbidea Foruen plazatik Gazteluko plazaraino doa. Adibidez, babes-hesi bat paratu zen; guztira 1.350 hesi iraulezin. Halaber, orgetan lurrerrainoko oihalak jartzea exijitu zen, eta kabalkadako mutilek alboak zaintzea.

Landabengo azoka

Beste urte batez ere, Landabengo azokak jardunean jarraitu zuen. Guztira 172 salpostu ipini ziren beste horrenbeste titularri esleituta, eta 10.000 pertsona inguru bertaratu ziren egun bakoitzean. Zehazki, 70 postu produktu jangarrien eremuan jarri ziren, eta 102 jangarriak ez diren produktuak saltzeko izan ziren. Ostalaritza-jarduerak ez daude baimenduak. Urteko igande guztietan dago zabalik, uztail eta abuztukoetan izan ezik, 09:00etatik 14:00etara.

Objektu galduak

Herritarrek horra eramaten dituzten objektu guztiak erregistratu egiten dira datu-base bakar batean. Polizia-gorputzek, posta-bulegoak, eskualdeko hiri-garraioaren enpresa esleipendunak eta merkataritza

arloko beste entitate batzuek –hipermerkatuek kasu– entregatzen dituzte gehienak. Objektuak udal-egoitzetan gelditzen dira gordailuan, eta langileak jabeak aurkitzen saiatzen dira. 2015ean, 6.895 objektu erregistratu ziren; 2014an, berriz, 6.594. Jabeai 3.227 itzuli zitzaizkien (2014an, 3.182).

